

431

Na osnovu člana 23. Zakona o Vladi Bosansko-podrinjskog kantona Goražde ("Službene novine Bosansko-podrinjskog kantona Goražde", broj: 8/15) te člana 33. Zakona o zdravstvenom osiguranju ("Službene novine FBiH", broj: 30/97, 7/02, 70/08, 48/11 i 36/18), na prijedlog Upravnog odbora Zavoda zdravstvenog osiguranja Bosansko-podrinjskog kantona Goražde, Vlada Bosansko-podrinjskog kantona Goražde, na 88. redovnoj sjednici, održanoj dana 28. 05.2021.godine, **d o n o s i:**

ODLUKU
obimu prava osiguranih lica
na korištenje ortopedskih i drugih
pomagala koja se obezbjeđuju na teret
sredstava Zavoda zdravstvenog
osiguranja Bosansko-podrinjskog
kantona Goražde

I - OSNOVNE ODREDBE**Član 1.**

Ovom se Odlukom utvrđuje obim, uvjeti i način ostvarivanja prava na korištenje ortopedskih i drugih pomagala i endoproteza (u daljem tekstu: pomagala), koja se osiguranim licima Zavoda zdravstvenog osiguranja Bosansko-podrinjskog kantona Goražde (u daljem tekstu: Zavod) obezbjeđuju po osnovu obaveznog zdravstvenog osiguranja. Obim prava iz stava 1. Ove Odluke određuje se jedinstvenom listom pomagala i endoproteza (u daljem tekstu: Lista), koja je sastavni dio ove Odluke, a u kojoj su utvrđeni vrsta, standardi za material od kojeg se izrađuju i rokovi trajanja ovih pomagala.

Član 2.

Zavod najmanje jedanput godišnje vrši evaluaciju Liste, što podrazumijeva usaglašavanje vrste pomagala sa liste sa potrebama osiguranih lica i usaglašavanje učešća Zavoda u odnosu na cijene na tržištu i finansijsko stanje u Zavodu.

Član 3.

Pomagala koja se ovom Odlukom obezbjeđuju osiguranim licima Zavoda smatraju se medicinskim proizvodima koji omogućavaju poboljšanje oštećenih funkcija odnosno, nedostatak organa i sistema organa, a koje je nastalo kao posljedica bolesti ili ozljede. Pomagala iz stava 1. Ovog člana moraju biti projektovana, instalirana, održavana i upotrijebljena prema propisanim uvjetima za namjenu za koju su proizvedena tako da ne ugrožavaju zdravlje korisnika. Projektovanje i proizvodnja tih pomagala mora se provoditi uz obezbjeđenje primjene tehničkih propisa o bezbjednosti proizvoda na tržištu, primjenu kodeksa dobre proizvodne prakse (GMP) kao i kodeksa dobre laboratorijske prakse (GLP) te ista moraju nositi oznaku ili potvrdu usklađenosti (CE) sa zahtjevima i direktivama Europske unije kao i razvrstana i registrovana u skladu sa Pravilnikom o medicinskim pomagalima ("Službene novine FBiH", broj: 58/06, 24/07 i 41/12).

Član 4.

Pomagala osiguranim licima propisuje ovlašteni doktor medicine – specijalista određene grane medicine i ovlašteni doktor stomatologije – specijalista

određene grane stomatologije, na osnovu medicinskih indikacija i rokova korištenja utvrđenih listom.

Pomagala osiguranim licima propisuje ordinirajući ljekar medicine – ordinarijus, na osnovu nalaza specijaliste određene grane medicine (u daljem tekstu: nalaz), na osnovu medicinskih indikacija i rokova korištenja utvrđenih listom.

Period važenja nalaza je godinu dana za pomagala koja se izdaju na mjesечноj bazi, ukoliko nije došlo do promjene, ukoliko dođe do promjene u tom slučaju se izdaje novi nalaz prije isteka navedenog roka.

Član 5.

Pravo na pomagalo iz obaveznog zdravstvenog osiguranja, osigurano lice ostvaruje pribavljanjem obrasca “Potvrda o potrebi izrade/nabavke ortopedskog i drugog pomagala i endoproteze” i obrazac “Potvrda o potrebi nabavke naočara” (u daljem tekstu: potvrda o pomaganju), koju izdaje ovlašteni ljekar specijalista određene grane specijalnosti, odnosno ovlašteni doctor stomatologije-specijalista određene grane stomatologije.

Potvrdom o pomaganju potvrđuje se da osigurano lice, na osnovu medicinskih indikacija, ima pravo na pomagalo u skladu sa odredbama ove Odluke.

Član 6.

Osigurano lice koje, u skladu sa odredbama ove Odluke, ostvari pravo na pomagalo ima pravo i obavezu koristiti to pomagalo u roku propisanom za njegovu upotrebu.

U periodu do isteka odobrenog roka ko-

rištenja, osigurano lice je dužno pomagalo održavati.

Ukoliko osigurano lice namjerno ili nesavjesnim korištenjem prouzrokuje oštećenje pomagala, odnosno pomagalo pokvari ili uništi, ne može ostvariti pravo na istovrsno novo pomagalo prije isteka propisanog roka upotrebe.

II - NAČIN OSTVARIVANJA PRAVA NA POMAGALO

Član 7.

Osigurano lice obavezno je izdatu potvrdu o pomaganju ovjeriti u Zavodu u roku od 30 dana. Ovjerena potvrda vrijedi 30 dana od dana ovjere Zavoda, u kom roku je osigurano lice obavezno izvršiti nabavku ili naručiti pomagalo.

Potvrdu o pomaganju ovjerava ovlašteni radnik Zavoda nakon što je utvrdio da je potvrda uredno popunjena sa potrebnim podacima: vrsta ortopedskog pomagala, dijagnoza bolesti, šifra pomagala, količina, kao i da je ista u skladu sa indikacijama koje su navedene u Listi, te da osigurano lice ispunjava uvjete za propisano pomagalo utvrđeno ovom Odlukom.

Ako osigurano lice ne nabavi ili ne naruči pomagalo u propisanom roku ili ovjerenu potvrdu ne može iskoristiti iz bilo kog razloga (npr. gubitak, neupotrebljivost zbog oštećenja i slično), obavezno je dostaviti na ovjeru novu potvrdu, a neiskorištenu na poništenje te, u slučaju njenog gubitka, dati pisanu izjavu ovjerenu kod nadležnog općinskog organa, pod materijalnom i krivičnom odgovornošću da potvrdu nije iskoristilo, što ovlašteni radnik Zavoda unosi u evidenciju.

Član 8.

Osiguranom licu Zavod obezbjeđuje sredstva do iznosa definisanog Listom ortopedskih i drugih pomagala. Ako osigurano lice nabavi pomagalo veće vrijednosti od propisanog stavom 1. ovog člana, razliku u cijeni pomagala snosi lično.

Odobrenu nabavku osigurano lice je dužno izvršiti u roku od 30 dana od dana kada je ovjerena Potvrda o potrebi izrade/nabavke ortopedskog i drugog pomagala i endoproteze od strane Zavoda. Ovaj rok se može produžiti zbog opravdanih razloga, a najduže za još 30 dana.

Član 9.

O odobrenom pomagalu te svim ostalim podacima u vezi sa odobrenim pomagalom, Zavod vodi evidenciju.

Ovjerena potvrda o pomagalu ne isključuje odgovornost ovlaštenog ljekara, koji je propisao pomagalo, za štetu učinjenu osiguranom licu, odnosno Zavodu, ako se u postupku kontrole pokrenute po službenoj dužnosti ili na prijedlog osiguranog lica utvrdi da je osiguranom licu odobreno pomagalo ili količina pomagala za koje ono ne ispunjava medicinske indikacije ili se utvrdi da ono funkcionalno ne zadovoljava potrebe osiguranog lica.

Član 10.

Pomagala sa Liste obezbjeđuju se osiguranom licu po isteku propisanog roka korištenja, kako je to utvrđeno u Listi. Rokovi korištenja računaju se od dana uručivanja/ovjeravanja Potvrde o pomagalu osiguranom licu od strane

Zavoda.

Osiguranom licu Zavod može, u izuzetnim slučajevima i prije isteka propisanog roka upotrebe odobrenog pomagala, ranije odobriti nabavku novog istovrsnog pomagala, zbog promjene zdravstvenog stanja osiguranog lica, a po nalazu ovlaštenog ljekara, kao i u slučaju da je pomagalo, također po nalazu ovlaštenog ljekara, neupotrebljivo zbog nastalih anatomskih, fizioloških, odnosno funkcionalnih promjena, a iste nisu posljedica nekorištenja pomagala, odnosno korištenja pomagala na nepropisan način.

Član 11.

U slučaju potrebe za količinom određenog pomagala većom od propisane ovom Odlukom, koju utvrđuje ovlaštenu ljekar određene grane specijalnosti, osigurano lice podnosi zahtjev Zavodu. Uz zahtjev za odobrenje veće količine pomagala, osigurano lice je dužno dostaviti medicinsku dokumentaciju sa detaljnim obrazloženjem potrebe za povećanom količinom pomagala, koju daje isključivo ovlaštenu ljekar.

Komisija za prava osiguranika i kontrolu lijekova razmatra zahtjeve iz stava 1. ovog člana, daje preporuku i mišljenje direktoru Zavoda te direktor donosi konačno rješenje.

III – PRELAZNE I ZAVRŠNE ODREDBE

Član 12.

Osigurano lice koje na dan stupanja na snagu ove Odluke koristi pomagalo ili kojem je započeta izrada pomagala po odredbama Odluke o obimu prava osiguranih lica na korištenje orto-

pedskih i drugih pomagala koja se obezbjeđuju na teret sredstava Zavoda zdravstvenog osiguranja Bosansko-podrinjskog kantona Goražde, broj:03-14-1506/16 od 23.09.2016.godine (“Službene novine Bosansko-podrinjskog kantona Goražde”, broj: 14/16) kao i Odluka o izmjeni i dopuni Odluke o obimu prava osiguranih lica na korištenje ortopedskih i drugih pomagala koja se obezbjeđuju na teret sredstava Zavoda zdravstvenog osiguranja Bosansko-podrinjskog kantona Goražde broj: 03-14-1845/16 od 02.12.2016.godine (“Službene novine Bosansko-podrinjskog kantona Goražde”, broj: 16/16), nastavit će koristiti to pravo u skladu sa odredbama istih.

Član 13.

Obavezuje se direktor Zavoda da u roku od 30 dana donese uputstvo kojim će se preciznije utvrditi način i postupak odobravanja izdavanja ortopedskih i drugih pomagala i endoproteza osiguranim licima Zavoda, a u skladu sa odredbama ove Odluke.

Član 14.

Stupanjem na snagu ove Odluke prestaje da važi Odluka o obimu prava osiguranih lica na korištenje ortopedskih i drugih pomagala koja se obezbjeđuju na teret sredstava Zavoda zdravstvenog osiguranja Bosansko-podrinjskog kantona Goražde, broj: 03-14-1506/16 od 23.09.2016.godine (“Službene novine Bosansko-podrinjskog kantona Goražde”, broj: 14/16), kao i Odluka o izmjeni i dopuni Odluke o obimu prava osiguranih lica na korištenje ortopedskih i drugih pomagala koja se obezbjeđuju na teret sredstava Zavoda zdravstvenog

osiguranja Bosansko-podrinjskog kantona Goražde broj:03-14-1845/16 od 02.12.2016.godine (“Službene novine Bosansko-podrinjskog kantona Goražde”, broj: 16/16).

Član 15.

Ova Odluka stupa nasnagu 8. (osmog) dana od dana objavljivanja u “Službenim novinama Bosansko-podrinjskog kantona Goražde”.

**Broj:03-33-892/21
28.05.2021.godine
G o r a ž d e**

**P R E M I J E R
Aida Obuća,s.r.**

.....